

## PIRIP JÕ KRĨ WÛR Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ, ne Roman jõ krĩ kam me hacjên xà kam ihkrĩ, ne pê Pirip jõ krĩ kam, Jeju na mehwÿ mehwĩatajê mã hõ kàhhôc ita kujate. Na pê hõ kàhhôc ita japrỳ pê **Pirip Jõ Krĩ Kam Jeju Na Mehwÿ Jakrã Mehkrĩ Atajê WÛr, Pawrô Jõ Kàhhôc** (Pirip).

Ne pom cu me hõ kàhhôc cahyt ita kam, Pawrô te me cumã amji jarên to hajÿr he. Me hacjên xà kam cute amjipupun kêanre cakrô, cormã cumã amji kîn. Mã Pirip jõ krĩ kam Jeju na mehwÿ te me Pawrô tehcajpar prãnte me cumã ihpore kujahêc, mã cuteipyr, ata pyrên ri hakryti na amji jarê. Ne me hacjên xà kam ihkrĩ cakrô, ihtÿj me hàhtôa mã Jeju pê me pahpytãr catê na harê. Ne hanea ne ihtÿj Jeju te amji kam hapac xà tuw pejti kôt kypê ipa nare na me cumã harê.

*Pawrô te amji jarên xà  
Me Hàpên Xà 16.12-40; 20.6*

<sup>1</sup> Hàpà me ikwÿ, pom me apê Jeju na mehwÿ, ca Pirip jõ krĩ kam ame akrĩ atajê. Ipê Pawrô, ne ipê Jeju Crixto mã ijãpên catê. Ne itea wa Timot me, pom caramã Jeju na ate me ajpên hõnco tu atajê mã ihkàhhôc ita ton. Ne pomihkàhhôc ita te hajÿar ne me akwÿ to mehhimpej catêjê

pupun catêjê atajê me, me akwỳ tehcajpar catêjê mã, wa ite mehkujahêc.

<sup>2</sup> Imã Pahpãm pê me pajõ Inxũ Cati me, me pajõ Pahhiti pê Jeju Cixtô te me ato impejti na me ato prãm. Ne cute me acaprĩ, ne me acaxwãm pê me acaxwỳn kam, me amã meacarĩcti impejti jõr to ipa na, imã me ato prãm.

<sup>3</sup> Ne wa hãn ne me ato amji japackre, ne me ana Pahpãm mã icakôc, ne cumã me ate amji kam me gapac xà pyrên ijakryti na amji jarẽ.

<sup>4</sup> Ne wa hãn ne me acajrên kam pra, ne imã amji kĩaan kam me acajrên.

*Cute me Pawrô tehcajpar pyrên hakry*

<sup>5</sup> Ampo na mã me apyrên ijakry? Nee mã ampo na nare! He pê ca mam me icahê na, Jeju to me gũjarên pejtĩ to me harên na me itehcajpa, ne ahnaa cormã me to xa.

<sup>6</sup> Ne imãa, quê ha Pahpãm me amã me ate amji kam me gapac xà to ipintuw to mõi ita na, ne ahnaa to xa ita kam, quê ha ahnaa jũ caxuw Jeju Cixtô te hacpỹne amji jaxàr xà jõ amcro kam ahtwỳ, quê ha me pahto impej pa, to wa pa apu amji kampa.

<sup>7</sup> Imã me akĩnti incwỳrjapê, wa itỳj amcro cunea kam me ato amji japackre. Ne jũ na ri ampeaj kam imã impej? Nee mã jũ na nare. Ca gõtpehãn ne icahê na me gápên to me apa, ate me itehcajpar prãmte. Na wa Pahpãm jarkwa kôt mehcunea mã Jeju pê me pahkritxwỳ jarên xà impejti to harên to ipa, mãr quê me kampa ne mehũnã. Ne quê ha jũm te apu Jeju te amji

kam hapac xà cuna mã ihcakôc kên to mōr na, wa ha itỳj intête cumã awjarẽ ne cupê hũtà. Na ca ramã me hacjênxà kam, ijỳr xà ata kam, me itehcajpar to me apa.

<sup>8</sup> Imã me akĩan to me akĩn te hajỳar, pom quê Jeju Crixto mã me pahkĩan to me pahkĩn he. Ne Pahpãm mã ri ijahkre pej, por waampeaj kam ite me ato ijapac xàhti na amji jarèn ata na.

### *Pê Pawrô Pahpãm mã mehcajrèn*

<sup>9-10</sup> Ne wa ijōtpê Pahpãm mã me acajrèn to hane he:

— Me ijō Inxũ, Pirip jō krĩ catêjê mã ajpênkĩnti to, quê me cumã ajpên kĩntiita, ma me cumã ipicamên to mō. Ne me cumã mehkrã kre te amji jahkre pejti gō, mār quê amji mã me ampo pej pit capi to me ipa ata to, ma me cumã apicamên to mō — hane. Ita to wa ijōtpê Pahpãm mã me acajrèn to amji kam ijapac to ipa. Hō, ita na quê ha jũ caxuw Jeju te amji jaxàr xà jō amcro kam ahtwỳ, caha me akên pê me apejti ne, ne me apahàm pê me acato, quê nee jũmjê me ato ihcakôc kên nare.

<sup>11</sup> Quê ha Jeju Crixto me acaxwãm pê me amã me acaxwỳn to ihtỳj. Ca ha Jeju cuxà amji kam me gapac xà impejti to me apa, quê ha mehcunea ahna megōmpu, ne me amji mã:

— Pỳhàpà! Ampeaj kam ri Pahpãm me cumã ampo tohahkre, ne mehtehcajpa, mã ita caxuw mehkênre nare, ne catyt kam me amji to ajpa. Ne Pahpãm ita ri catia to cati ne impej — hane.

*Pawrô me hacjên xà kam ikrĩ ita na, nee cute cumã jũ mãn nare*

*Me Hàpên Xà 28.30-31; Epet 6.19-20*

<sup>12</sup> Jeju kam ajpên to me ikjêjê atajê, nee apu ijũ na me akrihkrit nare, ne nee ampo na amjimã me ito pômã quê nare. Cute me ito kên catêjê te me ito kên crire nare, me hacjên xà itajê kôt. Cakrô wa ityj mehcunea mã Jeju jarênpejti jarên to ixãm ita na. Mã ramã me hàhtôa te me hahkre pej to mō.

<sup>13</sup> Ne Roman jō pjê jō pahhiti jũrkwa kam cute me hamãr catêjê me, kammehkrĩ catêjê me, mehcunea te ramã me ijahkre pejtu. Ampo cwýrjapê? Nee mã ampo cwýrjapê nare. He ipê Jeju mã ijapên catê, na ri ma ameicurê, ne cute me ijaxàr, cwýrjapê wame hacjên xà ita kam ikrĩ, mã mehcunea te me ijahkre pej.

<sup>14</sup> Ne Jeju kam me pahkjêjê kwý jãhtôa ne me hacjên xà ita kam me ipupu, ne xwý kam Jeju to amji mã mehhimpej to me ipa nare. Hō, ita cãmtà rũm ri neeme cumã jũm cupa nare, mã ihtýj Jeju to mehçakôc kam pra, ne nee amji na me ampo cãmji nare.

<sup>15-18</sup> Ne me pahkjêjê kwýa kwý mã ikĩn nare cakrô, mã ihtýj icuxà me Jeju to hũjarên to me ipa. Ampo na? Nee mã ampo na nare. Pomjũmjê itajê te ito ipipêan prãm to ri, ihtýj hãn ne Jeju to me hũjarên to me ipa. He ijũ na me cumã amji to prãm, na ri ame hane. Neampeaj kam me ipijapu xi, ne cama me hacjên xà ita kam imã ite amji pupun xà kêanre to me ipicamên to prãm. Ne ampeaj kam cama ita jũ naimã amji kĩan to amji kĩn. Ampo na? Ihtýj Jeju Crixto to me hũjarên

to me ipa na ri. Ne mehkwỳ nare, quêt me cumã ikĩn, cwỳrjapê ri ihtỳJeju to me hũjarên to me ipa. Ampo na? Por wa ite me cumã Pahpãm jarkwa cràn ata, nee mã ihhêj xi nare. Ne ampeaj kam ite me cumã ihêj xi jarên nare na, cute me ijahkre pej. Ne Pahpãm te ri ijàpên xà ita caxuw ixãm.

<sup>19</sup> Ne ampeaj kam me gũ na ijakry. Ampo na? Wa itỳj me ate Pahpãm mã ina me acakôc na, amji mã me ato hane. Na wa apu ijakry, ne itỳj jũ caxuw, Jeju Carõ Pejti kôt, ite me hacjên xà ita pê icator na, amji to hane.

*Pawrô nee hũ na Jeju pahàmti xà atajê nō ton prãm nare*

<sup>20</sup> Pê Pahpãm imã, ite amji kam ijapac xà ita mã cato, ne imã ijàpênxà ita gō, wa ikrĩ ne to pit mã apê. Ne imã jũ caxuw ijàpên xà ita kam ipec prãm nare, ne cama kam itỳjti, ne imã ijũcanãr to prãm pit. Neite amji kam ijapac xà ita kam, imã ijũcanãr tỳjti to prãm, pom ahnaa mã wa ita kam ton to mō, ita na wa ton to imōr to prãm. Ne imã itĩar kam, amji mã Jejujapry to ipicamên to prãm, ne hanea ne ityc xàa kam, imã amji mã to ipicamên to prãm.

<sup>21</sup> Ne imãa itĩar na ipa ita na impej. Ampo na? Wa hãn ne hōtpê itỳj Jeju to amji mã ihmpej to ipa. Ne ityc na ri itĩr jirôa pê imã impej. Ampo na? Wa ha jũ caxuw ty, ne ma Jeju wỳr api, ne curia cahê na ikrĩ rohnỳtti mã.

<sup>22</sup> Nãmri wa ha ite itĩr ita na ipa na, wa ha itỳj cormã ijàpên xà impejti ita kwỳ to ijàpên cri. Ne

itỳj hipêr Jeju wỳr mehkwỳ to apkjê. Ne jũ wa ha ajte amji mã capi?

<sup>23</sup> Nãmri imã pry pijakrut na wa ha amji mã ihnõ capi. Ne imã, ite amji kam ijapac xà ita jicu ne ityc, ne ma Jeju wỳr ijàpir, ne cahê na ikrĩ na, imã amji topřãm. He ita na ri imã impeaj to impej.

<sup>24</sup> Ne ite me atehcajpar to přãm to ri, cormã ita ri imã ipa to přãm.

<sup>25</sup> Cwỳrjapê wa itỳj cormã pjê kam me acahê na ipa na ite amji jahkre pej. Ite me atehcajpar, ca ate me apicamên to me amõr, ne Pahpãm to amji mã me ahimpej kam me gakryti na, ca me amji to mehprãm.

<sup>26</sup> Wa ha cormã me awỳr amji jaxà, ca ha me ipupu, ne ampeaj kam me gakry. Ca ha ate me Jeju Crixto japrỳ to apicamên to přãmte me to gũjarên to:

— Ampeaj kam Jeju cati ne carôt tỳj ne impej, cwỳrjapê ri hacpỹa necute me pamã Pawrô kujahêc — hane.

*Cu ha pahỳj me pahte amji pupun xà kêanre  
ata kam awcanã  
Juta 3*

<sup>27</sup> Nare, wa ha nee me awỳr icator nare cakrô, wa itỳj me garên par to přãm. Ne pom ite me amã harên itajê cunea jirôa pê impej catia atana ri, imã me ato přãm he. Ca ha me acunea catyt kam, me apejti kam, me Jeju pê me pahkritxwỳ jarên pejti itajê to pit mã, amji to me apijapar to me apa. Ne imãme acuhtom pej pêa mã, ate

me gâpên xà pê Jeju jarên pejti to, ate me amji cujtên to me apa na imã me garên par prãm.

<sup>28</sup> Ne nee ca amji mã me acurê xwÿn te Jeju cuna mã mehcakôc xiti itajê cupa nare, ne cama me cuna mã amji to mehtÿaj ne. Quê ha amji name acajpẽ, ne amji mã me garên to:

— Co he! Quê ha me cumã me pahcupanare ita kam ame hane, ne ihtÿj me pajirô pê xa — hane. Ampo na? Quê ha ihtÿj Pahpãm ate me hirô pê axãm xà caxuw me amã me acarôt gô, ca ha atÿj me mentête hahê ne hirô pê xa, quê ha me hamre.

<sup>29</sup> Ne Pahpãm te, ate Jeju Crixto mã me gâpên xà na, me apyxwÿr. Cwÿrjapê ca ha me kampa, ne ma amji mã me to ahimpej to me apa kam, me to acrà tu ne. Ne hanea ne icuxàcumã me amji pupun xà kêanre to me amji pupun to me apa.

<sup>30</sup> Pê ca ramã me pahcurê xwÿn pê, ite Jeju te amji kam hapac xà pytâr na, me ipupu. Pê wa iteamji pupun xà kêanre ita me ajco amji cujtên to ipa, pê ca ahna me ijarên pa he. Na ca ha ita kam icahê na ate me hÿtâr prãmte, cu ha pahtÿj me amji cujtên to me papa rohnÿtti mã. Na ca ha hanea ne, icuxà ikôt me amji pupun xà kêanre to me amji pupun to me apa.

## 2

*Me pahte amji kam me pajapac xà pyxit peaj kôt, cu ha me amji kampa*

*Roman 15.5-6; Epet 4.1-6*

<sup>1</sup> Imã me acunea te cuprôn ne amji na me ahônco tu na, me ato prãm. Ca ramã Jeju Crixto

to amji mã me ahimpej, cwýrjapê ri ampo cunea caxuw meamã me acarôt tỳj. He ramã Jeju mã me akĩn na ri cumã me acaprĩ. He ramã Pahpãm Carõ Pejti te amji mã me ato cuprõn, ne ate amji kam me gapac xà to me amã pyxit peaj. Cwýrjapê ri me acaxwãm pê me amã ajpẽnķĩn, na ca atỳj me ajpẽn caprĩ to me apa.

<sup>2</sup> Pom wa ramã me apyrên ijakryti na amji cajpê ita na, wa ha hipêr me ana ahwỳ, ca me imã ijakryti ita to ajcamê. Ne imã me ate amji kam megapac xà pyxit peaj to, ate amji kam me gapac na me ato prãm. Ne mam me amã ajpẽn ķĩn ita jirõa pê, quê me amã ajpẽn ķĩn, ne quê meacaxwỳn cunea ajpẽn kam pyxit peaj.

<sup>3</sup> Ne nee ca me gápên xà to me amji cajpuaw prãmte ame gápên nare, ne nee amji pejti na me amji jarên nare, ne nee amji to me acati to me apa prãm̃nare. Ne quêt cama me amji mã:

— Mõrmõ ijirõa pê mehcunea cati — hane.

<sup>4</sup> Ne nee apyxit peaj ne ate amji kam me gapac xà ata toamji mã me ahimpej to me apa nare, ne quêt atỳj me akwỳ te amji kam hapac xà to me hanea, ne me amji mã me ahimpej to me apa.

*Pê Jeju me hirõa pê cati cakrõ, nee amji to cati prãm nare*

*Jowãw 13.12-17; Epet 1.20-23; Iipẽn Xà 5.1-14*

<sup>5</sup> Ne quê ate amji kam me gapac xà pê, Jeju Crixto te amji kam hapac xàa. Ne Jeju jarên xà ita ca ha me kampa, ne ihkõat me ton to me mõ.

<sup>6-7</sup> Ne Jeju me Pahpãm pipëan, ne catia to cati cakrõ,



pê nee cumã amji jarẽn to:

“Wa papipëan rohnýtti mã na amji to prãm”  
hajýr nare.

Ne quêt cama cumã amji cuprãr tu,  
ne côjkwa jicu, ne pjê wýr wrý,  
ne me paxũmrea na amji to,  
ne cama amji to me pamã hàpên catê.

<sup>8</sup> Ne nee amji to cati prãm nare,  
ne quêt pjê kam Hũm jarkwa kôt apu ipa,  
ita kam ahnaa pĩ kam ihtyc.

<sup>9</sup> Cwýrjapê pê Pahpãm hipêr to ajcamê,  
ne to catia to cati,  
ne mehcunea jõ Pahhiti na hãm.

<sup>10</sup> Ne cute Jeju japrý to me cati prãm to,  
quê ha côjkwa kam me ipa catêjê me,  
pjê kam me ipa catêjê me,  
pjê krac ri cute me harêt catêjê me,  
Jejucuna mã mehkõn krã na me jý,  
mehcunea kam mare mã,  
ne me harẽn to hane he:

<sup>11</sup> “Jeju Crixtô pê ri quêt mehcunea jirô pê  
Pahhiti cati” hane.

Ita na quêt ha mehcunea Pahpãm pê Jeju Pãm  
peaj na me hahkre pej,  
ne mehkwymã harê.

*Pê Pahpãm ri me pamã me pahcarôt to ihtýj*

<sup>12-13</sup> Pê ca atýj, imã me ijõ ikwý nõ kĩnti catêjê  
atajê, ajco me ikampa, ne wa ha ita caxuw ite  
ame acahê na imõr nare cakrô, ca haatýj ampýa  
mã amji mã me ikam gapac to me prãm. Ne  
Pahpãm mã catyt kam me apa, ne ajpên na me  
ahônco tu na, cumã me ato prãm. Cwýrjapêri  
me acaxwãm pê me ato ihhimpej, ne ate mempar

prãmti na me atehcajpa, ne ate ihkôt me amji ton na me atehcajpa. Ne me gîkjê kam me ato ihhimpej, ca me gîkjê kam, hanea ne me kampa ne amji mã me hũpa, me gápên xà me, me ate amji kam me gapac xà kam. Hôhõ, ca ha me hane, ne me gĩ cunea kam me apejti ne.

*Cu ha catyt kam me papa, mãr quê me pahkôt hanea ne catyt kam me ipa*

<sup>14</sup> Ca ha ate amji kam me gapac xà cunea kam, nee ajpên mã me gâhcãhhõnnare, ne nee ajpên krac ri me acakôc nare.

<sup>15</sup> Ca ha ate me hajÿr na, ca ha ampo kên cunea na me gamreare ne, ne nee me ate amji kam me gapac xà tũm nare, ne quêt ihtetetti ne. Ne me apêPahpãm kra impejti cwÿrjapê ca ha me hane. Ca atÿj mehkên me, cute me amji kam hapac xà kêanre tũm, kam awcapàtkôti atajê jipôc ri ameakrĩ. Ne atÿj me cumã Pahpãm te amji kam hapac xà kôt harên to me akrĩ. Mãr quê hanea ne me acuxà, ate amji kam me gapac xà itajê mã me acjêj. Ca me gápên xà ita kam, me apê ihhêj rũm cõjkwa kam awcapàtkôti kam caxêre prà tetetti atajê pyràac, ne me apràti ne.

<sup>16</sup> Wa ha me apyrên ijakryti ne, por jũ caxuw Jeju Crixto te amji jaxàr xajõ amcro ata kam. Ampo na? Nee mã ampo na nare. Curi quê ha mehcunea me ijahkre pej, por pê wa ramã me amã ijapên xà tÿaj to, ata na, ne neeme apê kôt hamreare nare na. Pawrô mã hakryti ita to, me hakryti na me to prãm

<sup>17</sup> Pê ca ramã Pahpãm mã me gápên to catia to cati, ne kam me amji pupun xà kêanre to me amji

pupu. Ne me apê gâhcukrêj crêre cakrô, caatÿj me imã ampo gã, ate Pahpãm mã ijâpên xà ita tehcajpar prãmte. Ne ate itehcajpar prãmita pê ihhêj rûm ate Pahpãm mã me ampo jôr. Ne Pahpãm to ate amji to me ahimpej prãmte, ca ame itajê to hane. Ne ate me ampo itajê ton xà kam, ajco ampeaj kam me gakry. Wa ha hanea ne ipê meapyràac, ne itÿj amji pupun xà kèanre to amji pupun to ipa, Pahpãm jâpên xà ita cwÿrjapê. Ne quê ha ihtÿj jũ caxuw amcro nõ na me icura, wa ha ipê me apyràac ne Pahpãm mã icaprô gã ne ty. Ne wa ha ipê meapyràac ne ampeaj kam ita pyrên ijakry to hanea, pom quê ca mam ame gakry ita na he.

<sup>18</sup> Quê ha jũ caxuw me ito hane, wa ha ijakrya ne nõ. Ca ha me ca xwÿjê icuxà atÿj me gakrya to me gakry.

*Quê ha Pawrô Timot te me hõmpun prãmte, ihtÿj me hÿrmã ihkujate*

<sup>19</sup> Quê ha ihhêaj to me pajõ Pahhiti pê Jeju mã me amã Timot kujahêc pyrentu to prãm na, wa ha me amã ihkujahêc pyrentu. Quê me apupu ne me gahkre pej, ne hacpÿ ne amji jaxà ne imã me garê, mâr wa me garên pejti impar xà kôt, ma amji mã icarôt to ihtÿj.

<sup>20</sup> Ne Timot pê ipyràac ne pyxit peaj, ne ihtÿj me ato amji kam hapac to ipa. Ne ihtÿj me ate Jeju kôt amji to me apicamên na cumã me ato prãm.

<sup>21</sup> Ne ihkĩnte mehkwy cunea te nee me hajÿr nare, ne cute me amji kam hapac xà topit mã me

amji kam hapac to me ipa, ne nee Jeju Crixto te amji kam hapac xà to me amji kam hapac nare.

<sup>22</sup> Ne nee Timot te hajÿr nare, ne ihhêj rûm cupê ikraa, ne ihtÿj icahê na mehcunea mã Jeju jarên pejti jarên to ipa na, ramã mehcunea te me hahkre pej.

<sup>23</sup> Wa ha ita ri cute ame ito amji kam hapac xà na me hahkre pejjirô pê mã, wa ha amû me awÿr ihkujahêc pyrentu.

<sup>24</sup> Ne wa hanea ne itÿj me awÿr ikràr. Na wa itÿj me pajõ Pahhiti pê Jeju te me awÿr itêm na ijamâr na, amji mã to hane.

### *Quê ha Pawrô ma hacpÿ mã me cumã Epaprôti kujate*

<sup>25</sup> Ne pê ca me imã me pahtõ pê Epaprôti kujate, cute ite amji mã ampo na prãmte xà itajê na itehcajpar prãmte. Ne ramã cute icahê na hàpênxà ita me, ajpên cujtên crire nare. Na wa itÿj hacpÿmã me amã ihkujahêc prãm.

<sup>26</sup> Ne ampeaj kam ri ramã Epaprôti mã me apupun prãamto me apupun prãm. Ne ihtÿj hà na ate me hahkre pej na amji mã me ato hane. Ne hà itana, ate amji mã me to põmã quê na, amji mã me ato hane.

<sup>27</sup> Ne ampeaj kam pê hàà to hà, ne ajmâr ty. Pê Pahpãm mã caprĩ pê caprã, pê hacpÿa mã impej. Ne hanea ne Pahpãm mã ramã ite me to ijapac xàhti ita na icaprĩ, na wa nee hipêr kam icwÿr nare to prãm.

<sup>28</sup> Cwÿrjapê wa itÿj hacpÿa mã me amã ihkujahêc to prãm, ate me hĩa pupun ne hacpÿ mã me

amã amji kîn prãmte. Wa ha pa xwỳjê imãamji kîn nōti ita jũa kam ipê tẽ.

<sup>29</sup> Na ca ha Epaprōti pê Jeju kam me pahto ihkjê ita to me gakrya kam me amji pytà. Ca ha atỳj amji mã me hũmre atajê cupa.

<sup>30</sup> Ne cute Jeju Crixto jàpên xà kam amji mã ihtyc cupa nare, cwỳrjapê ri ihkên mã hâr, ne ajmâr ihtyc. Ampo na? Ca ampỳa mã ipê ame apa, ne jũ wỳr ca me itehcajpa, mã me gaxà kam cute itehcajpar. Na ca ha atỳj amji mã me hũmre ata cupa, ne catia na amji mã me to hane.

### 3

*Pê Pawrô amji caprỳ to Pahpãm te ahna amji caxàr prãmte ampo cunea to*

*Pirip 2.18; 4.4*

<sup>1</sup> Ne ijàhhôc ita jicu xà kam, me ikjêjê, imã me ate Jeju kam me gakryti na me ato prãm. Xãmte, cormã imã me amã ihnõ ata jarên xà. Ne pê wa ramã amã harëan xà na, wa ha hipêr amã ahna ihhôc. Nehipêr ite ahna me amã ihhôc xà ita te me amã jũ mãn nare, ne nee hanea ne imã cute ahna jũ mãn nare.

<sup>2</sup> Co he! Ma amji na me hũmre kên pê rop na hamreare pyrác atajê to me guphê! Nãmri ihtỳj me apê me akà kwỳ jakep to prãm to, me amã hũjarên to hane he:

— Gapacta ne Jeju to amji mã me ahimpej, ne hanea ne meipê Juta catêjê quêtjê te amji to me icaca xàa kôt me apy kà kwỳ to kryjre ne me hakep. Hõ, me acaca xà pijakrut itajê to, ca

ha me, quê ha Pahpãm ihtÿj me amã amji capa neme apytà — hane.

<sup>3</sup> Ne ame amã ihhêj xia jarê. Ampo na? He cu ha me amji kà kwÿ jakep ita nee me pahto Pahpãm kra impej nare. Ne quêt Pahpãm Carõ Pejti ri me pamã Pahpãm to hahkre, mâr cu me hahkre pej ne amji mã me hÿpa, ne me pamã ihkĩnti ne, quê hataa me pahto amji kra, cu ha Jeju kam me amji hõnco ne ampeaj kam me pajakry. Ne pom xwahna Juta catêjê jõ amji kĩn me, cute me amji kam hapac xà itajê kõt mã Pahpãm mã me pahkĩn. Hãpà! Nee mã ampoitajê kõt Pahpãm mã me pahkĩn nare. Ne quêt ita na ri Pahpãm mã me pahkĩn, mã me pahpytà he. Pom pê Jeju me pajaxà kam ty, cu toa amji to me pahhimpej xà ata to, quê ha Pahpãm quêt me pahkên pê me pahpytà.

<sup>4</sup> Ne pê wa Pahpãm te ipytàr prãmte, amji caprÿ to, me hirõa pê ampo itajê ton partu.

<sup>5</sup> Ne pê xwahna cormã icrire na, ina amcro te ôjtõ kam, pê me ipy kà kwÿ jakep, Juta catêjê te amji to incaca xà ata kõt. Ne me ipãmjêpê Juta catêjê impeaj kra, ne me cupê me iquêtjê nõ, pê Pẽnjamĩ xwÿ tàmwxwÿ tàmwxwÿ nõ ata kra. Ipê Juta catêjê impeaj nõ wa. Nepê wa Juta catêjê te amji kam hapac xà cunea kõt amji ton pa. Ne me ikwÿ pê Parixêw catêjê atajê pê catyt kam ajco me ipa.

<sup>6</sup> Na pê wa ajco me hàpên xà ita to ijàpên catia to ipa. Ne Pahpãm te ikĩn prãmte itÿj ajco Jeju na mehkwy to pên to ipa. Mã xãmtePahpãm pê ita na ihkaj na, ikam. Hõ, pê wa ajco Juta catêjê te amji kam hapac xà cunea ton to hajÿr to ipa,

Pahpām mā ikīn prāmte. PêJuta catêjê cunea mā ihhêj ne ipeaj to ipej. Ne pê wa pa hanea ne ajco amji pejti na amji to hane. Ne pê xāmte Pahpām mā nee ita na ikīn nare, ne ahna cupê ihkaj na.

*Pawrô ita caxuw Jeju Crixto te amji kam hapac xàa kôt ipa to prām*

<sup>7-8</sup> Na wa quêt ita caxuw Jeju to amji mā ihmpej to ipa. Ne mam ampo pejti itajê to ite amji mā ihmpej to ipa xà atajê ri, nee hipêr imā ampo caxuw impej nare ne ihkêanre. Ne Jeju Crixto pê ijō Pahhiti ata, wa quêt ite hōmpun ne hahkre pej ne ampeaj kam quêtimā ihkīn, ne mam ampo itajê ri imā ihkīn nare. Na ri imā cupê ahhi, ne imā ihkīn nare, wa ite pō mā ihcunea to ijūcapêr, ne nee hipêr ihnō to amji japackre nare, ite Jeju kam amji hōnco tu to prām to.

<sup>9</sup> Na ri Pahpām te ito impej, wa ipejti, cwÿrjapê ri cumā ipejti. Ampo na? Wa nee itacaxuw cumā ipejti prām to Juta catêjê te amji kam hapac xà atajê to amji jahôt prām nare. Ne quêt Jeju Crixto to, wa ha amji mā ihmpej to ipa, nema to amji jahôt to ipa.

<sup>10-11</sup> Na wa ita caxuw Jeju Crixto pit pupun pejti to prām, ne carôat kôt amji to ipijapar to prām. He Pahpām mā carôt ata to ri cute hacpÿa mā Jejuto ihtîr. Na wa ha itÿj hanea ne cuxà, cute amji pupun xà kêanre ata to amji pupun to prām, necuxà ityc to prām, mār wa ipê hÿràac ne hacpÿa mā itîr.

*Pawrô nee cormã catyt kam Crixto te amji kam hapac xà cunea kôt ipa nare*

12 He wa nee pa amji jarën to ihmpej to:

— He ramã ite amji kam ijapac xà cunea na ipeaj to ipej, ne nee jũ kam ijõ nuwre nõ kam, ikên kênre nõ hamreare — hajÿr nare. Ne cama quêt amji jarën to hane he:

— Wa ramã Jeju Crixto kôt ipa ita to, iteamji jĩ tÿj tu, ne cormã ipej ita kôt ipicamën to imõr to prãm — hane. Ne cormã ipejti wÿr icator xà ita pê ihhêj rũm ijàhcukren xà, wa hÿrmã amji mã icarõt to ijũhcajhê to mõi, ite hucu xà mã icator to prãm to, ne nee cormã hÿrmã icator nare. Hepê ramã Jeju Crixto amji mã ito prãmte xà ata caxuw ipro.

13 Cwÿrjapê wa ha nee hipêr mam icaca xà itajê nõ to amji japackre nare, ne quêt icumam itajê to pit mã, wa ha amji japackre.

14 Ne icatàatre na, pry jicu xàa kam ipicahur catê te amji mã hàmcwÿr xà ata pyr prãmte, hÿrmã ihteam to tẽ. Ita jĩkjê na wa apêa to apê, ite amji mã Pahpãm te imã hàmjõr xà ata pyr prãmte. Mã Pahpãm imã hàpõr to mõi, ite Jeju Crixto kôt ipej pêa mã, cahê na ikrĩ rohnÿtti mã xà caxuw.

15 Hõhõ, ite amji kam ijapac xà ita to wa amji kam ijapac to ipa. Ne pom Jeju kôt ramã me pahte me papa to me amji jĩ tÿj tu itajê cunea te amji kam hapac xà itari me pamã. Ne ca ihhêaj to me anõ te amji kam gapac xà ita to hajÿr nare na, quê ha Pahpãm me anõ mã to hahkre, ca ha hahkre pej pej.

16 Ne me pahcunea te hajÿr pit, cu ha me hajÿr to me pamõr mã mã, ma me pamõr ita kam me



to pancrà tu. Pom pê catyt kam ramã ampeaj kam mepamã to hahkre xà ata na.

<sup>17</sup> Me ikjêjê, pom wa me akam mare mã ampo ton to mō ita na, ca me ipynār kam me to acrà tu ne. Ne ma hanea ne amji caxuw mam ikôt me ipacatêjê atajê te amji kam me hapac xà atajê na mehkôpîr to me apa, ne megàhkôpîr xà atajêa kôt me amji ton to me apa.

*Me hàhtôa pê Crixto curê xwÿn kêanre  
Carati 6.12-13*

<sup>18</sup> He pê wa ramã me amã awjarêa, na wa ha hipêr icwÿar kam me amã harê. Ne mehkwy te amji kam me hapac xà kêanre, ne me cupê Jejucurê xwÿn, na rí me to hÿjarên to:

— Por pê pî kam Jeju ty ata, ampo nahamreare, ne nee jÿ na xà caxuw impej nare — hane.

<sup>19</sup> Atajê quê ha amjia kôt amji to me hamre to mō, ne me hamre. Ampo na? Nee mã ampo na nare. Cute me hajÿr xà atajê, quê ha me to hamre. He me hâpàn pê ri ihhêj rÿm me hō Pahpãm. Ne mehcunea mã cute ampo tonxà kam mehpahàmti atajê ton to me ipa. Ne cormã mehcunea mã, cute ampo kam mehpahàmti ton xà ata pyrên me amji jakryti na me amji jarên toipa, ne nee ajte amji jÿ na amehpahàm nare. Ne pjê kam ampo itajê to pit mã amji kam me hapac to me ipa, ne nee Pahpãm to ajte amji kam me hapac to me ipa nare.

*Me papê côjkwa te amji kam hapac xà catêjê*

<sup>20</sup> Ne me pa, cu ha nee ame hajÿr nare. Ampo na? Côjkwa kam quêt me pahkrî xà, to cu ha me amji japackre to me papa. Ne cu pahtÿj,

cute me pahkênpê me pahpytâr catê pê me pajõ Pahhiti pê Jeju Crixto te curũam ajpên ihtêm na me hikaj.

<sup>21</sup> Quê ha Jeju jũ caxuw me pajĩ peacre, ne ihtyc atajê to antuw. Quê ha me pajĩ pê Jeju jĩa pyrác, ne ampeaj kam impej ne ihtÿj. Na cu ha jũcaxuw me pahnõ pahtyc nare. Ampo na? He mehcunea jirõa pê Jeju carõt tÿj, na ri pyxit peaj ne mehcunea to ihhimpej.

## 4

*Cu ha pahtÿj me pahcunea Jeju na me pahhõnco kam me to pancrà*

*Coroxo 3.15*

<sup>1</sup> Imã me ikjêjê kĩnti atajê, ampeaj kam me ato ijapac xà! Pê wa ajco me amã Jeju jarkwa jarên pejti to ipa, pê ca me awpa ne ihkõat me amji ton to me apa, na ri me apê me imã ijakryti ton catêjê. Na wa itÿj me pajâpên xà itajê kõt mehcunea mã me apejti na me ato ijâmnãn to ipa. Ne imã me gũcanãar kam me ate Jeju na me ajpên hõnco tu kam me to acrà tu na, me ato prãm.

<sup>2</sup> Ỹhÿ me ikjêjê cahãj pê Ewotikwÿj me, Xintikwÿj ata, he ca ihhêj ne atÿj ajpên krac ri ame acakõc to me apa, na wa ha me awÿr xà ita to me awÿ he:

— Nee ca me ajpên mãn to me acuhhê tu nare. Ampo na? Me apê Pahpãm kra impeaj. Ne mër ampo na mã ca ajte ame ajpên mã? Hipêr me hajÿr nare — hane.

<sup>3</sup> Ne ca, ikwỳ nō Xixic, he apê ijō ikwỳ nō peaj, na wa ha awỳ, mār ca ajpēn caxuw pyjê atajê japackre, ne hacpỹ mǎ ajpēn na me axô. Pê wa pyjê atajê me, Cremēnti me, por icahe na me hâpên catêjêatajê me, pê wa ajkaam me apê, ite me Jeju pê me pahkritxwỳ jarēn xà impejti incràn xà caxuw, pê wa me to ijâpên catia. Atajê japry ramā Pahpām jō kâhhôc kam hikwa, cute cahê na amji to me ipijapar rohnýtta mǎ xà caxuw.

<sup>4</sup> Ne imǎ me acunea te Jeju kam me ajpēn hōnco tu kam me gakryti na me ato prām. Na wa me amǎ:

— Me gakrya ne — hane!

*Quê ha Pahpām me pamā amji carīcti gō*

<sup>5</sup> Ca ha ajpēn pê me akrā to arêr nare, ne quêt mehcunea kam mare mǎ me gâhcayrēnti, jâhcaprīhti to me apa. Ampo na? Quê ha ahtūm nare, quêha me pajō Pahhiti amji jaxà.

<sup>6</sup> Ne nee ate amji mǎ ampo na prāmte xà ata na apu amji to pōmǎ quê to apa nare, ne quêt cama amji na Pahpām wỳ. Quê amǎ ampo itajê gō, canee hahpan xà na cumǎ gakryti na amji jarēn to gapac kêt nare.

<sup>7</sup> Ca ha ate me ite me amǎ ampo jarēn xà itajê cunea ton na, quê ha Pahpām me amǎ amji carīcti jōr to hanea, pom quê ihcarīcti he, ne me amǎ ampej partu, Jeju kam ate me ajpēn hōnco tu ita kam. Quê ha jūmjê meapupu ne me amji mǎ:

— Jū mǎ mǎ ajte cute me, ne mehkên xà atajipôc ri mehcarīcti? — hane. Hōhō, quê ha

cute me ana Pahpãm caca xà jahkre pej nare kam, me ato ihcakôc to hane.

*Cu ha ampo pej to pit mã amji kam me pajapac to papa*

*Roman 12.1-2*

<sup>8</sup> Ne ite me amã ihhôt xà ita jicu xà kam wa ha cormã me amã ampo to ihmpej. He mORMÕ ca amji kam me gapac xà na me amji cukij to:

— Ampo to mã wa ha ajte amji kam ijapac to ipa? — hane. He, ampo te ôjtô itajê to, wa ha me amã hahkre he:

Mam ita pê ri ampo pejti, kam ampo kên nare ata to, ca ha me amji kampa.

Ne ihkôt ita ri he, jũm jàpên xà impejti na pajàhtàtti xà ata to, ca ha me amji kampa.

Neihcote na ita ri he, ampeaj kam ampo to mehhêj xi xà nare ata to, ca ha me amji kampa.

Ne ihkôtjũm caca xà impejti tũm nare ata to, ca ha me amji kampa.

Ne hapu na ita ri he, por Pahpãm mãampo cunea impejti atajê to, ca ha me amji kampa.

Ne ihkôt ita ri he, por ampo na nee jũm cakôc xà kên nare ata to, ca ha me amji kampa.

Ne hapua na ita pê ri, por ampo me pahcajpuaw ata to, ca ha me amji kampa.

Ne ihcahhur ita pê ri, ampo to me pahcakôc xà impejti ata to, ca ha me amji kampa.

Hõ, ampoitajê to ri ate amji kam me gapac xà he.

<sup>9</sup> Na pê ca me ijarkwa ita pa, ne me ite amji kam ijapac xà ita pupu, ne me hahkre pej, ne ihkôat ca ha catyt kam me apa. Hõ, Pahpãm te

me pamã mepahcarĩcti jõr xà ata quê ha me amã cugõ, ne ihtÿj me acahê na ipa rohnÿtti mã.

*Pawrô te amji kam hapac xà kam hakrya to hakry*

<sup>10</sup> Pajõ Pahhiti cãmtà rûm ri, ite amji kam ijapac xà kam ijakrya to ijakry. Ampo na? He pê ca rÿ pêa mã ajco gõ pore to me ijamã. Jirõ pê mã ca nee hipêr ate gõ pore to me ijamâr nare. Ne corpej mãca ate hacpÿa mã me gõ pore to me ijamâr kam me atêm. Ne atÿj ate me ito amji kam gapac na imã me gahkre pej, ne jÿ wÿr ca ha cama me amji mã hamã.

<sup>11</sup> Wa nee, jÿm te imã hikran na, to amji kam ijapac nare, ne nee ipê ampo hamreare na amji to icakõc nare. Ampo na? Wa ite ramã ita ton to amjipyràc tu, ampo cunea kam.

<sup>12</sup> Ampo na? He pê wa ramã amji na ite amji kam ijapac xà itajê cunea pãjpãj partu. Ne imã ite amji kam ijapac xàa na ipê ampo hamreare na, imã amji kÿn nare nare, ne hanea ne imã ampo catia na ite jÿ mãn nare. He pê wa amji na ijaquêc xà pãjpãj itajê kam, wa ihcunea to amji tekjê.

<sup>13</sup> Ne pom ite amji kam ijapac xà itajê cunea kam, wa Jeju carõat kõt ijũcanâr to ipa.

<sup>14</sup> Ne ate ite amji pupun xà kêanre itajê na me itehcajpar ata na ri, imã ihkênre nare.

<sup>15</sup> Ne pê wa mam ite me amã Jeju jarên pejti jarên xà ata jõ amcro cakõnĩ na, pê ca me, me gõ pore to ajco me itehcajpa. Pê wa me gõ pjê pê amji to icator xà ata kam, pê ca cormã ampÿa mã ajco meitehcajpa. He me gagrã ata pyxit peaj

te me itehcajpar na, ihtỳj me amãa amji jahkre pej. Ne ate me itehcajpar xà ata na, pê hanea ne Pahpãm ajco me atehcajpa.

<sup>16</sup> Taamã xãmte cormã ihnõ he. Pê wa Texarõn jõ krĩ kam apu ipa, pê ca ajco atỳj ite ampo na prãm xà ata to me itehcajpar to me apa.

<sup>17</sup> Nee mã hipêr ate me Timot me imã ampo jõr xà na, wa me amã ita jarên nare, ne hipêr Pahpãm pê ate amji mã me ampo cwỳr, na ri quêt imã me ato prãm.

<sup>18</sup> Mã ita ri Eaprôti cator ne cute me imã, ate me imã ampo jõr atajê jõr. Ne pom ihkàhhôc ita pê ate imã ampo jõr xà atajê jõr kàhhôc.

### *Pawrô mehkwỳ pyrên hakrya*

Ne ampeaj kam ca ate imã ampo na ijàhwỳr xà itajê jirôa pê hõr. Na ri ampeaj kam imã amji kĩn ne ijakry. Ne Pahpãm mã ate me imã ampo jõr xà itajê imej te hajỳar, pom quê cumã ampo kũm cuxwati pãr prãm he. Ne me pahte me cupê ampo jamreare atajê mã ampo jõr xà atajê pê ihhêjrũm Pahpãm mã pahte me hõr xà, ne ampeaj kam cumã ita na ihkĩn.

<sup>19</sup> Ne imã me pajõ Inxũ Cati pê Pahpãm ihtỳj me amã ampo na ate mehprãmti atajê jõr na, me ato prãm. Ne nee quê ha amã ihkênre ne hõr nare, ne amã catia ne cugõ. Ne quêt Pahpãm catia to cati, ne haneane Jeju Crixto mã hàhcukrêj to hakràaj to hakràj, na ca ha ampo na me wỳ, quê ha nee amã ihkênre ne hõr nare, ne amã hàhcukrêj to me hakràjto ipipêan xà atajê gõ.

<sup>20</sup> Ne imã mehcunea te me pajõ Inxũ pê Pahpãm catia to cati na, cute me hahkre pej ne amji mã me harẽn na imã me to prãm, rohnýtti mã. He ampeaj kam!

*Pê Pawrô me cumã amji jarẽn kujate*

<sup>21</sup> Hàpà, me apê Jeju Crixto tekjê, wa me ato amji kjê atajê. Ne pom ita ri me pahkjêjê icahê na ame ipa itajê te hajyar ne me amã amji jarẽn kujahêc.

<sup>22</sup> Ne por Pahpãm tekjê na me ipa atajê cunea te me amã amji jarẽn kujahêc. Mã hanea ne ita ri Roman catêjê jõ pahhiti jũrkwa kammehkrĩ atajê te me amã amji jarẽn kujahêc.

<sup>23</sup> Ne imã me pajõ Pahhiti pê Jeju Crixto te me amã ampejti na me ato prãm. Hamre, ita pit.

**PAHPÃM JARKWA CUPAHTI JÕ KÀHHÔC**  
**Canela: PAHPÃM JARKWA CUPAHTI JÕ KÀHHÔC**  
**(Portions)**

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 1 Oct 2024 from source files  
dated 29 Jan 2022

09d4e460-c38b-52b7-81c1-8300bfeb466a